

四庫全書

子部

欽定四庫全書

子部

冊府元龜卷三百七十八

五至

詳校官中書臣羅錦森

侍讀臣孫球覆勘

總校官庶吉士臣何思鈞

校對官中書臣范鰲

謄錄監生臣周桐

欽定四庫全書

冊府元龜卷三百七十五

宋 王欽若等 撰

將帥部

褒異

夫褒勸之典有國之常道也况夫三軍之帥百夫之特
有斬將搴旗之勇却敵捕虜之勞足以經武貞帥開地
斥境何嘗不剖符疏壤厚封崇之命疇庸贊書極尊獎
之數以至加地進祿稱功計伐或錫之車服或加之印

綬或許其世襲或崇其官呼或沒而可稱禮光於詔葬
或死而可作事美於追榮皆所以疇勞而勸能賞善而
旌德使效節之士罄其精忠方來之人於焉激勵傳曰
藏在盟府不可廢也謂是物矣夫

周召公虎為卿士平淮夷宣王賜以鬯酒一尊使以祭其
宗廟告其先祖故江漢之詩曰釐爾圭瓚秬鬯一卣告

於文人

釐賜也秬黑黍也鬯香草也築煮合而鬱之為
鬯卣器也九命賜圭瓚秬鬯文人文德之人也

又曰錫山川土田於周受命自召祖命

周岐周也自用
也宣王欲尊顯

召虎故如岐周使虎受山川土田之賜命用其祖召康公受封之禮岐周周之所起為其先祖之靈故就之

申伯居謝宣王命召公營其位而作城郭及寢廟定其

人神所處故崧高之詩曰申伯之功召伯是營有俶其

城寢廟既成

俶作也

又曰既成藐藐王錫申伯四牡蹻蹻

鈞膺濯濯

藐藐美貌蹻蹻壯貌鈞膺樊纓也濯濯光明也召公營位築之已成以形貌告於王王乃

賜申伯為將遣之

王遣申伯路車乘馬我圖爾居莫如南土

乘馬

四馬也王以正禮遣申伯之國故復有車馬之賜因告之曰我謀女之所處無如南土之最善

錫爾介

圭以作爾寶

寶瑞也圭長尺二寸謂之介非諸侯之圭故以為寶諸侯之瑞圭自九寸而下

衛武公初為武侯犬戎為亂武公將兵往佐周平戎甚有功周平王元年命衛侯為公

士會晉大夫也帥師滅赤狄晉侯請於周定王王以黻

冕命士會將中軍且為太傅

代荀林父將中軍且以太傅之官黻冕命卿之服

太傅孤卿也

秦蒙恬始皇時為將攻齊大破之拜為內史

漢陳平為護軍中尉從高帝擊韓王信於代至平城為

匈奴圍七日不得食高帝用平奇計使單于闕氏

音馬支

解圍以得開高帝既出其計秘世莫得聞高帝南過曲
逆上其城望室屋甚大曰壯哉縣吾行天下獨見雒陽
與是耳顧問御史曲逆戶口幾何對曰始秦時三萬餘
戶間者兵數起多亡匿今見五千餘戶於是詔御史更
封平為曲逆侯盡食之平自初從至天下定後嘗以護
軍中尉從擊臧荼陳豨黥布凡六出奇計輒益封邑

曹參沛人也高祖為沛公參以中涓從

涓潔也言其在中主知潔涓洒

掃之事蓋親近左右也

擊胡陵方與

音房

攻秦監公軍大破之

秦一

郡置守尉
監三人

東下薛擊泗水守軍薛郭西復攻胡陵取之

賜爵七大夫又攻下邑以西至虞擊秦將章邯車騎攻

轅戚及亢父

音杭甫

先登遷為五大夫楚懷王以沛公為

碭郡長將碭郡兵於是乃封參執帛

楚爵孤卿也

號曰建成

君遷為戚公又虜秦司馬及御史各一人遷為執珪

侯伯

珪及沛公為漢王封參為建成侯從至漢中遷為將軍

參將兵守景陵三秦使章平等攻參參出擊大破之賜食

邑於寧秦

今華陰

周勃沛人也沛公初起勃以中涓從攻胡陵下方與方
與反與戰却敵攻豐擊秦軍碭東還軍留及蕭復攻碭
破之下下邑先登賜爵五大夫沛公為漢王漢王賜勃
爵為威武侯從入漢中拜為將軍還定三秦賜食邑懷
德又東定楚地泗水東海郡凡得二十二縣還守雒陽
櫟陽賜與潁陰侯共食鍾離以將軍從高祖擊燕王臧
荼破之易下所將卒當馳道為多當高祖所
行之前賜爵列侯
剖符世世不絕食絳八千二百八十戶

樊噲以舍人從高祖攻胡陵方與

皆縣名方音房與音豫

還守豐

擊泗水監豐下破之

泗水郡名監謂御史監郡者也破之於豐縣下

復東定沛

破泗守薛西

破郡守於薛縣之西

與司馬卮戰碭東

秦將章卮之司馬也卮讀

與夷同

郤敵斬首十五級賜爵國大夫

即官大夫也爵第六級

常從

沛公擊章邯軍濮陽攻城先登斬首二十三級賜爵列

大夫

即公大夫也爵第七級

從攻陽城先登下戶牖

陽武縣之鄉

破李

繇軍斬首十六級賜上聞爵

得徑上聞也呂氏春秋曰魏文侯東勝齊於長城天

子賞文侯以上聞又曰名通於天子也

從攻圍都尉東郡守尉於成武

圍即

陳留郤敵斬首十四級捕虜十六人生獲賜爵五大夫

從攻秦軍出亳南

亳成湯封邑今河南偃師湯亭是

河間守軍於杠里破

之

杠音江

擊破趙賁軍開封北

賁音奔

以郤敵先登斬候一

人首六十八級捕虜二十六人

既斬候一人又更賜爵斬它首六十八級

卿從攻破揚熊於曲遇

曲音丘羽切遇音顯

攻宛陵先登斬首八

級捕虜四十四人賜爵封號賢成君

食祿比封君而無邑也楚漢之際權

設寵榮假其位號或得邑地或空受爵此例多矣

從攻長社輟輶絕河津東攻

秦軍尸鄉南攻秦軍於犍破南陽守齧於陽城東攻宛

城先登西至酈

南陽之縣也音直益切

以郤敵斬首十四級捕虜

四十人賜重封

重封者加二號耳

項羽在戲下欲攻沛公沛公

從百餘騎因項伯面見項羽謝無有閉關事項羽既饗

軍士中酒亞父謀欲殺沛公令項莊拔劍舞坐中欲擊

沛公噲居營外聞事急乃持盾入營是日微噲沛公幾

殆後數日項羽入屠咸陽立沛公為漢王漢王賜噲爵

為列侯號臨武侯遷為郎中從入漢中還定三秦別擊西

丞白水北

西謂隴西郡西縣也白水水名經西縣東南流而過言擊西縣之丞於白水之北

擁

輕車騎雍南破之從攻雍棨城先登

棨讀與郃同縣名即后稷所封今武

功故城是音胎

擊章平軍好時攻城先登陷陣斬縣令丞各一

人首十一級虜二十人遷為郎中騎將從擊秦車騎壞

東

地名也

郤敵遷為將軍攻趙賁下郿槐里柳中咸陽

柳中

即細柳地也在長安西

灌廢丘最

引水灌廢丘

至櫟陽賜食邑杜之樊

鄉

杜縣之鄉也今曰樊川

從攻項籍屠煮棗

清河有煮棗城功臣表有煮棗侯又曰既

云攻項籍屠煮棗則其地當在大河之南非清河之城明矣俱未悉其處

擊破王武程處軍

於外黃攻鄒魯瑕丘薛項羽敗漢王於彭城盡復取魯

梁地噲還至滎陽益食平陰二千戶以將軍守廣武一

歲

即滎陽之廣武

項羽引東從高祖擊項籍下陽夏

夏音上雅切

虜

楚周將軍卒四千人

周殷

圍項籍陳大破之

於陳縣圍之

屠胡

陵項籍死漢王即皇帝位以噲有功益食邑八百戶其

秋燕王臧荼反噲從攻虜荼定燕地楚王韓信反噲從

至陳取信定楚更賜爵列侯與剖符世世勿絕食舞陽

號為舞陽侯除前所食以將軍從攻反者韓王信於代

自霍人以往至雲中與絳侯等共定之益食千五百戶

因擊陳豨曼丘臣軍戰襄國破柏人先登降之定清河

常山凡二十七縣殘東垣

殘謂多所殺傷也

遷為左丞相破得

綦母卬尹潘軍於無終廣昌

姓綦母名卬也綦音其

破豨別將胡

人王黃軍代南因擊韓信軍參合軍所將卒斬韓信擊

豨胡騎橫谷斬將軍趙既虜代丞相馮梁守孫奮大將

王黃將軍大將一人太僕解福等十人與諸將共定代

鄉邑七十三後燕王盧綰反噲以相國擊綰破其丞相

抵薊南

抵至也一說抵者其丞相之名也音丁禮切

定燕縣十八鄉邑五十

一益食千三百戶定食舞陽五千四百戶

酈商高陽人也

酈音歷

陳勝起商聚少年得數千人沛公

畧地六月餘商以所將四千人屬沛公於岐從攻長社

先登賜爵封信成君從攻緱氏絕河津破秦軍雒陽東

從下宛穰定十七縣別將攻旬關

漢中旬水上之關也今在洵陽縣

西

定漢中

先言攻旬關定漢中然後云沛公為漢王是則沛公從武關藍田而來商時別從西道平定漢

中沛公為漢王賜商爵信成君以將軍為隴西都尉別

定北地郡破章邯別將於烏氏枸邑泥陽

烏氏安定縣也枸邑今在

幽州泥陽北地縣
氏音支拘音荀

賜食邑武城六千戶從擊項籍軍與

鍾離昧戰受梁相國印

漢以梁相國印授之

益食四千戶從擊項

羽二歲攻胡陵漢王即帝位臧荼反商以將軍從擊荼

戰龍脫先登陷陳破荼軍易下

今易縣

郤敵遷為右丞相賜

爵列侯與剖符世世勿絕食邑涿郡五千戶別定上谷

因攻代受趙相國印

初受梁相國印今又受趙相國印

與絳侯等定代

郡雁門得代丞相程縱守相郭同

守相謂為相而居守者

將軍以

下至六百石十九人還以將軍將太上皇衛一歲十月

以右丞相擊陳豨殘東垣又從擊黥布攻其前垣

謂攻其壁

壘之前垣

陷兩陳得以破布軍更封為曲周侯食邑五千一

百戶除前所食

夏侯嬰以縣令史為高祖使上降沛一日高祖為沛公

賜爵七大夫以嬰為太僕常奉車

為沛公御車

從攻胡陵嬰

與蕭何降泗水監平

胡陵平所止縣嘗給之故與降

平以胡陵降賜嬰

爵五大夫從擊秦軍碭東攻濟陽下戶牖破李繇軍雍

丘以兵車趣攻戰疾破之

趣讀曰促謂急促也次下亦同

賜爵執帛

從擊章邯軍東阿濮陽下以兵車趣攻戰疾破之賜爵

執圭從擊趙賁軍開封揚熊軍曲遇嬰從捕虜六十八

人降卒八百五十人得印一置

時自相署置官之印

又擊秦軍雒

陽東以趣攻戰疾賜爵封轉為滕令

今沛郡公丘縣

因奉車此

又每奉車從攻戰以至霸上

從攻定南陽戰於藍田芷陽

芷陽後為霸陵縣

至霸上沛公為漢王賜嬰爵列侯號昭平侯復為太僕

從入蜀漢還定三秦從擊項籍至彭城項羽大破漢軍

漢王不利馳去見孝惠魯元載之漢王急馬罷虜在後

罷讀曰疲常踰兩兒棄之

踰音撥又音跋物之跋

嬰常收載行面雍樹

馳

面借也雍抱持之言取兩兒令面背已而抱持之以馳故云面雍樹馳雍讀曰擁

漢王怒欲

斬嬰者十餘卒得脫而致孝惠魯元於豐漢王既至榮

陽收散兵復振賜嬰食邑沂陽

沂音魚依切

擊項籍下邑追

至陳卒定楚至魯益食茲氏

茲氏縣名地里志屬太原

漢王即帝位

燕王臧荼反嬰從擊荼明年從至陳取楚王信更食汝陰剖

符世世勿絕從擊代至武泉雲中益食千戶因從擊韓信

軍胡騎晉陽旁大破之追北至平城為胡所圍七日不

得通高帝使使厚遺關氏冒頓乃開其圍一角高帝出

欲馳嬰固徐行弩皆持滿外鄉

故示開暇所以固士卒心而令敵不測也鄉讀

曰卒以得脫

卒終也

益食嬰細陽千戶

益其邑使食之

從擊胡騎

句注北大破之擊胡騎平城南三陷陳功為多賜所奪

邑五百戶

時有罪過奪邑者以賜之

從擊陳豨黥布軍陷陳郤敵邑

千戶定食汝陰六千九百戶除前所食

灌嬰以中涓從擊破東都尉於成武及秦軍於杠里疾

鬪賜爵七大夫又從攻秦軍亳南開封曲遇戰疾力

疾急

速也力強力也賜爵執帛號宣陵君從攻陽武以西至雒陽破

秦軍尸北北絕河津南破南陽守齟陽城東遂定南陽

郡西入武關戰於藍田疾力至霸上賜爵執圭號昌文

君沛公為漢王拜嬰為郎中從入漢中十月拜為中謁

者從還定三秦下櫟陽降塞王還圍章邯廢丘未拔從

東出臨晉關擊降殷王定其地擊項羽將龍且魏相項佗

軍定陶南疾戰破之賜嬰爵列侯號昌文侯食杜平鄉

杜縣

之平復以中謁者從降下碭以北至彭城項羽擊破漢王

漢王遁而西嬰從還軍於雍丘王武魏公申徒反

故秦將降為公

擊破之攻之外黃西收軍於滎陽楚騎來衆漢王乃擇軍中

可為騎將者皆推故秦騎士重泉人李必駱甲

重泉縣名也地理志屬左

馮翊習騎兵今為校尉可為騎將漢王欲拜之必甲曰臣故秦

民恐軍不信臣臣願得大王左右善騎者傅之

傅音附猶言隨從者

嬰雖少然數力戰乃拜嬰為中大夫令李必駱甲為左右

校尉將郎中騎兵擊楚騎於滎陽東大破之受詔別擊楚

軍後絕其饗道

饗古餉字

起陽武至襄邑擊項羽之將項冠於

魯下破之將卒斬右司馬騎將各一人

主右方之馬左亦如之又曰下所謂

左右千擊破拓公王武軍燕西

拓縣名公者拓之令也王武其人姓名燕亦縣名古

南燕國也音一千切

所將卒斬樓煩將五人

樓煩縣名其人善騎射故名射士為樓煩取其

稱也連尹一人

楚官也

擊王武別將桓嬰白馬下破之所將卒

斬都尉一卒以騎渡河南送漢王到雒陽從此迎相國韓

信軍於邯鄲還至教倉嬰遷為御史大夫三年以列侯食

邑杜平鄉受詔將郎中騎兵東屬相國韓信擊破齊軍於

歷下所將卒虜車騎將軍華毋傷

華音下化切

及將吏四十六

人降下臨淄得相田光追齊相田橫至嬴博二縣名擊破

其騎所將卒斬騎將一人生得騎將四人攻下嬴博破

齊將軍田吸於千乘斬之東從韓信攻龍且留公於假

密留縣名公留令也攻龍且及留令於假密卒斬龍且嬰所將之卒也其下亦同生得右

司馬連尹各一人樓煩將十人身生得亞將周蘭亞次也

齊地已定韓信自立為齊王使嬰別將擊楚將公杲於

魯北破之轉南破薛郡長長亦如郡守也身虜騎將入

攻博陽前至下相以東南僮取慮徐僮取慮徐三縣也取音趨又音秋慮

音度淮盡降其城邑至廣陵

謂從下相以東南盡降城邑乃至廣陵皆平定

項

羽使項聲薛公郟公復定淮北嬰度淮擊破項聲郟公

下邳斬薛公下下邳壽春擊破楚騎平陽

此平陽在東郡

遂降

彭城虜柱國項佗

佗音徒何切

降留薛沛酈蕭相

兒六縣酈音才何切

攻苦醮復得亞將周蘭與漢王會頤鄉從擊項籍軍陳

下破之所將卒斬樓煩將二人虜將八人賜益食邑二

千五百戶項籍敗垓下去也嬰以御史大夫將車騎別

追項籍至東城破之所將卒五人共斬項籍皆賜爵列

侯降左右司馬各一人卒萬二千人盡得其軍將吏下

東城歷陽渡江破吳郡長吳下

吳郡長當時為吳郡得長嬰破之於吳下

吳守遂定吳豫章會稽郡還定淮北凡五十二縣漢王

即帝位賜益嬰邑三千戶以車騎將軍從擊燕王荼明

年從至陳取楚王信還剖符世世勿絕食潁陰二千五

百戶從擊韓王信於代至馬邑別降樓煩以北六縣斬

代左將破胡騎將於武泉北復從擊信胡騎晉陽下所

將卒斬胡白題將一人

胡名也

又受詔并將燕趙齊梁楚

車騎擊破胡騎於渚石

渚音千
生切

至平城為胡所困從擊

陳豨別攻豨丞相侯敞軍曲逆下破之卒斬敞及特將

五人

卒謂所將之卒也
特獨也各獨為將

降曲逆盧奴上曲陽安國安平

攻下東垣黥布反以車騎將軍先出攻布別將於相破

之斬亞將樓煩將三人又進擊破布上柱國及大司馬

軍又破布別將肥銖嬰身生得左司馬一人所將卒斬

其小將十人追北至淮上益食邑二千五百戶布已破

高帝歸定令嬰食潁陰五千戶除前所食邑凡從所得

二千石二人別破軍十六降城四十六定國一郡二縣
五十二得將軍二人柱國相各一人二千石十人嬰自
破布歸高帝崩以列侯事惠帝及呂后至呂祿等欲為
亂齊哀王聞之舉兵西呂祿等以嬰為大將軍往擊之
嬰至滎陽乃與絳侯等謀因屯兵滎陽風齊王以誅呂
氏事風讀日諷齊兵止不前絳侯等既誅諸呂齊王罷兵歸
嬰自滎陽還與絳侯陳平共立文帝於是益封嬰三千
戶賜金千斤為太尉

傅寬以魏五大夫騎將從為舍人起橫陽從攻安陽杠

里趙賁軍於開封及擊楊熊曲遇陽武斬首十二級賜

爵卿從至霸上沛公為漢王賜寬封號共德君

共讀曰恭

從

入漢中為右騎將定三秦食邑雕陰

縣名屬上郡

從擊項籍

待懷

待高帝於懷懷縣名也地理志屬河內地今懷州

賜爵通德侯從擊項冠

周蘭龍且所將卒斬騎將一人敖下

敖地名敖倉蓋取此名也左氏傳曰

敖師之間益食邑屬淮陰

韓信也信時為相國云淮陰者終言之也

擊破齊歷下

軍擊田解屬相國參殘博

參曹參也博大山縣也

益食邑因定齊

地剖符世世不絕封陽陵侯二千六百戶除前所食為

齊右丞相備齊

時田橫未降故設屯備

斬歙以中涓從起宛胸

歙音吸宛音於元切胸音具于切

攻濟陽破李

繇軍擊秦軍開封東斬騎千人將一人

騎將率號為千人漢儀注邊郡

置部都尉千人司馬侯也

首五十七級捕虜七十三人賜爵封臨平

君又戰藍田北斬車司馬二人

主車也

騎長一人騎之首

二十八級捕虜五十七人至霸上沛公為漢王賜歙爵建

武侯遷騎都尉從定三秦別西擊章平軍於隴西破之定

隴西六縣所將卒斬車司馬候各四人騎長十二人從東擊楚至彭城漢軍敗還保雍丘擊反者王武等畧梁地別

西擊邢說軍菑南破之

菑縣名也後為考成說讀曰悅

身得說都尉二人

司馬候十二人降吏卒四千六百八十人破楚軍滎陽東食邑四十二百戶別之河內擊趙賁軍朝歌破之所將卒得騎將二人車馬二百五十匹從攻安陽以東至棘蒲下十縣別攻破趙軍得其將司馬二人候四人降吏卒二千四百人從降下邳鄆別下平陽身斬守相所將卒斬兵守

郡一人

言兵郡守一人也

降鄴從攻朝歌邯鄲又別擊破趙軍

降邯鄲郡六縣還軍敖倉破項籍軍成皋南擊絕楚餉

道起滎陽至襄邑破項冠魯下畧地東至鄆郟下邳南

至蘄竹邑擊項悍濟陽下還擊項籍軍陳下破之別定

江陵降柱國大司馬以下八人生得江陵王致雒陽

江陵

王謂共敖之子共尉也得之送致於雒陽

因定南郡從至陳取楚王信剖符

世世勿絕定食四千六百戶為信武侯以騎都尉從擊

代攻韓信平城下還軍東垣有功遷為車騎將軍并將

梁趙齊燕楚車騎別擊陳豨丞相敞破之侯因降曲逆

從擊黥布有功益封定食邑五千三百戶

任敖沛人也少為獄吏高祖嘗避吏吏繫呂后遇之不

謹任敖素善高祖怒擊傷主呂后吏及高祖初起敖以

客從為御史守豐二歲高祖立為漢王東擊項羽敖遷

為上黨守陳豨反敖堅守封為廣阿侯食邑千八百戶

申屠嘉梁人也以材官蹶張材官之多力能脚蹋彊弩張之故曰蹶張今之弩以

手張者曰擘張以足蹋者曰蹶張蹶音厥擘音布麥反從高祖擊項羽遷為隊

率

一隊之率也
音所類切

從擊黥布為都尉孝惠時為淮陽守孝

文元年舉故以二千石從高祖者悉以為關內侯食邑

三十四人而嘉食邑五百戶

周亞夫為將軍文帝六年匈奴大入邊以宗正劉禮為

將軍軍霸上祝茲侯徐厲為將軍軍棘門以河內守亞

夫為將軍軍細柳以備胡帝自勞軍至霸上及棘門軍

直馳入將以下騎出入送迎已而之細柳軍軍士吏被

甲銳兵及彀弓弩持滿

彀張也
音邁

天子先驅至不得入

先驅

導駕者也若先驅曰天子且至軍門都尉曰軍中聞將
今之武侯隊

軍之令不聞天子之詔有頃上至又不得入於是上使

使持節詔將軍曰吾欲勞軍亞夫乃傳言開壁門壁門

士請車騎曰將軍約軍中不得驅馳於是天子乃按轡

徐行至中營將軍亞夫揖曰介冑之士不拜請以軍禮

見禮介者

天子為動改容式車

古者立乘凡言式車者謂俛身撫式以禮敬人

式車前

使人稱謝

謝告也

皇帝敬勞將軍成禮而去既出

軍門羣臣皆驚文帝曰嗟乎此真將軍矣鄉者霸上棘

門如兒戲耳

鄉讀曰嚮

其將固可襲而虜也至於亞父可得

而犯耶稱善者久之月餘三軍皆罷乃拜亞父為中尉直不疑景帝時為御史大夫吳楚反時不疑以二千石將擊之武帝修吳楚時功封不疑為塞侯

李廣與從弟李蔡俱為郎事文帝景帝時蔡積功至二千石武帝元朔中為輕車將軍從大將軍擊右賢王有功中率封為樂安侯

李敢者廣之少子也敢以校尉從驃騎將軍擊胡左賢

王力戰奪左賢王旗鼓斬首多賜爵關內侯食邑二百戶

衛青武帝元光六年拜車騎將軍擊匈奴出上谷斬首虜數百騎賜爵關內侯元朔元年秋青復將三萬騎出鴈門斬首虜數千明年青復出雲中遂取河南地為朔方郡

當北地郡之北黃河之南

以三千八百戶封青為長平侯益封

青三千八百戶五年春青將三萬騎出高闕得右賢裨

王十餘人

裨王小王也裨頻移切

衆男女萬五千餘人畜數十百萬

於是引兵而還至塞帝使使持大將軍印即軍中拜青
為大將軍益封青八千七百戶

霍去病為票姚校尉

票姚音飄遠又票頻妙切姚羊召切

與輕勇騎八百

直棄大將軍數百里赴利斬捕首虜過當多過所當也以二

千五百戶封去病為冠軍侯元狩三年春為驃騎將軍

將萬騎出隴西有功益封去病二千二百戶其夏去病

出北地遂深入至祁連山

即天山也

捕首虜甚多益封五千

四百戶武帝又嘉去病之功以千七百戶益封四年春

去病出定襄執訊獲醜七萬有四百四十三級以五千八百戶益封秩祿與大將軍等

趙充國以假司馬從貳師將軍擊匈奴大為虜所圍充國乃潰圍陷陳貳師遂得解身被二十餘創武帝親見視其創嗟歎之拜為中郎遷車騎將軍長史昭帝時武都氐人反充國以大將軍護軍都尉將兵擊定之遷中郎將將屯上谷

領兵屯於上谷

還為水衡都尉擊匈奴獲西祁

王擢為後將軍宣帝本始中為蒲類將軍征匈奴斬虜

數百級還為後將軍少府

辛慶忌為右校丞隨長羅侯常惠屯田烏孫赤谷城與

歛侯戰

歛即翕字也歛侯烏孫官名

陷陳卻敵惠奏其功拜為侍郎

鄭吉宣帝時以侍郎田渠黎積穀因發諸國兵攻破車

師遷衛司馬使護鄯善以西南道

鄯善音善

神爵中匈奴乖

亂日逐王先賢禪欲降漢

禪音纏

使人與吉相聞吉發渠

黎龜茲諸國五萬人迎日逐王口萬二千人小王將十

二人隨吉至河曲頗有亡者吉追斬之遂將詣京師漢

封日逐王為歸德侯吉既破車師而降日逐威震西域

并護車師以西北道故號都護

並護南北二道故謂之都都猶大也總也

都

護之置自吉始焉帝嘉其功效乃下詔曰都護西域騎

都尉鄭吉拊循外蠻宣明威信

禮云東夷北狄西戎南蠻然夷蠻戎狄亦四方

之總稱耳故史傳又云百蠻也

迎匈奴單于從兄日逐王衆擊破車師

兜訾城

訾子移切

功效茂著其封吉為安遠侯食邑千戶

段會宗為左曹中郎將發戍已校尉諸國兵誅烏孫末

振將太子番丘還奏事公卿議會宗權得便宜以輕兵

深入烏孫即誅番丘宣明國威宜加重賞孝成元延中
天子賜會宗爵關內侯黃金百斤

後漢王常初歸光武封山桑侯

山桑縣屬沛郡今亳州縣

後帝於大

會中指常謂羣臣曰此家率下江諸將輔翼漢室心如

金石真忠臣也是日遷常為漢忠將軍遣南擊鄧奉董

訢令諸將皆屬焉又與王霸共平沛郡賊

苗虛也

及徵還

雒陽令大夫迎常於舞陽歸家上塚西屯長安拒隗囂
七年使使者持璽書即拜常為橫野大將軍位次與諸

將絕席

絕席謂尊顯之也

來歙為大中大夫至略陽斬隗囂守將金梁因保其城
囂悉兵數萬人圍略陽自春至秋其士卒疲弊光武乃
大發關東兵自將上隴囂衆潰走圍解於是置酒高會
勞賜歙班坐絕席在諸將之右賜歙妻練千疋詔使留
屯長安悉監護諸軍

鄧禹為大司徒渡汾陰河入夏陽更始中郎將左輔都
尉公乘歙引其衆十萬與左馮翊兵共拒禹於衙

衙縣名屬

左馮翊 禹破走之光武嘉之數賜書褒美十三年天下平
定封為高密侯

寇恂為河內太守行大將軍事時朱鮪聞光武北而河

內孤使蘇茂賈彊渡鞏河攻溫

今雒州縣

恂因奔擊大破之

時光武初即位軍食急乏恂轉輸不絕帝數策書勞問
後為潁川太守擊斬潁川嚴終等寇定封恂雍奴侯邑
萬戶

馮異為偏將軍從光武破王郎封應侯又從平河北拜

異為孟津將軍擊陽翟城賊嚴終趙根破之詔異歸家

上冢使大中大夫齋牛酒令二百里內太守都尉已下

及宗族會焉時赤眉延岑暴亂三輔代鄧禹討之車駕

送至河南賜以乘輿七尺具劍

具謂以寶玉裝飾之

異與赤眉遇

於華陰相拒六十餘日戰數十合降其將劉始王宣等

五千人三年春遣使者即拜異為征西大將軍大破赤

眉衆於峭底降男女八萬人降璽書勞異後朝京師引

見帝謂公卿曰是我起兵時主簿也為吾披荆棘定關

中既罷使中黃門賜以珍寶衣服錢帛

岑彭為刺姦將軍光武使督察衆營授以常所持節從

平河北及帝即位拜廷尉行大將軍事又破許邯於杏

南陽復陽縣有杏聚降董訢遷征南大將軍及擊秦豐敗走封為

舞陰侯後以將伐蜀漢引兵屯津鄉縣名所謂江津也徵詣京

師數召讌見厚加賞賜復南還津鄉有詔過家上冢後

彭破荆門降邛穀王任貴會彭薨帝盡以任貴所獻賜

彭妻子

賈復為破虜將軍光武至信都以為偏將軍及拔邯鄲
遷都護將軍復又擊鄴賊破之光武即位拜為執金吾
封冠軍侯先渡河攻朱鮪於雒陽與白虎公陳僑戰連
破降之益封穰朝陽二縣又擊召陵新息平定之

新息縣名

屬汝南郡遷左將軍後定封膠東侯食郁秩壯武下密即墨

挺胡觀陽凡六縣

六縣皆屬膠東國壯武故城在今萊州即墨縣西下密在今青州北海縣

東北即墨在今萊州膠水縣東南挺胡故城在今萊州昌陽縣西北觀陽在昌陽縣之東挺一音廷

吳漢為偏將軍既拔邯鄲

光武使漢等將突騎揚兵戲馬士騎馳環邯鄲城乃圍之

賜號建策侯光武即位拜大司馬更封舞陽侯及平蜀
振旅浮江而下至宛詔令過家上冢賜穀二萬斛後薨
詔發北軍五校輕車介士送葬如大將軍霍光故事

蓋延為偏將軍號建功侯從光武平河北及即帝位以
延為虎牙將軍更封安平侯又從征董憲於昌慮皆破
平之又與來歙攻河池以病引還拜為左馮翊後增封
定食萬戶

陳俊為彊弩偏將軍光武賜絳衣九百領以衣中堅同

心士與五校戰於安次俊下馬手接短兵所向必破追
奔二十餘里斬其渠帥而還帝望而歎曰戰將盡如是

豈有憂哉及光武即位封俊為列侯又攻匡賊下四縣

更封新處侯

縣名在中山國

又追討張步斬之帝美其功詔俊

得專征青徐

賜璽書曰將軍元勳大著威震青徐兩州有警得專征之數

上書願擊

隴蜀詔報曰東州新平大將軍之功也負海猾夏盜賊

之處國家以為重憂且勉鎮撫之又增邑定封祝阿侯

縣名

屬平

原郡

臧宮為偏將軍從光武破羣賊數陷陳却敵及帝即位

以為侍中騎都尉又封成安侯將突騎與祭遵擊更始

將左防韋顏於沮陽悉降之又將兵徇江夏擊代鄉鍾

武竹里皆下之

鍾武縣屬江夏郡故城
在今申州鍾山縣西南

帝使大中大夫

張明持節拜宮為輔威將軍後更封期思侯

縣名屬
汝南郡又

與吳漢滅公孫述帝以蜀地初定拜宮為廣漢太守增

邑更封鄴侯

耿况為大將軍封隃廩侯與子舒攻彭寵取軍都

軍都
縣屬

廣陽 寵死光武嘉况功使光祿大夫持節迎况 袁山松書曰使

光祿大夫樊宏詔况曰惟况功大不宜監察從事邊郡寒苦不足久居其詣行在所 賜甲第奉朝

請封牟平侯後况疾病乘輿數自臨幸

耿弇為偏將軍說光武益發精兵以集大計光武大悅乃拜弇為大將軍及帝即位拜弇為建威大將軍攻破厭新賊於敖倉更封好時侯食好時美陽二縣

銚期為偏將軍從光武擊破王郎拜期虎牙大將軍光武即位封安成侯 安成縣名屬汝南郡故城在今豫州汝陽縣東南 食邑五千

戶後卒帝親臨襚斂贈以衛尉安成侯印綬

王霸為軍正爵關內侯既至信都發兵攻拔邯鄲霸追斬王郎得其璽綬封王鄉侯光武即位以霸曉兵愛士

可獨任拜為偏將軍又更封富波侯

富波縣名屬汝南郡在今豫州

祭遵受偏將軍從光武平河北以功封列侯又拜征虜將軍定封潁陽侯後從車駕上隴及隗囂破光武東歸過汧幸遵營勞享士卒作黃門武樂良夜乃罷時遵有疾詔賜重茵覆以御蓋復令進屯隴下後遵卒帝愍悼

之尤甚遵喪至河南縣詔遣百官先會喪車駕素服臨之望哭哀慟還幸城門過其車騎涕泣不能已喪禮成復親祠以太牢如宣帝臨霍光故事詔大長秋謁者河南尹護喪事大司農給費至塋車駕復臨贈以將軍侯印綬朱輪容車介士軍陳送塋既塋車駕復臨其墳存見夫人室家遵無子帝追傷之以從弟彤為偃師長令近遵墳墓四時奉祠之

李忠為右將軍從光武攻下屬縣至苦陘

苦陘縣名屬中山國章帝

改曰漢昌自此以後隨代
改之今為定州唐昌縣

帝會諸將問所得財物惟忠

獨無所掠光武曰我欲特賜李忠諸卿得無望乎即以
所乘大驪馬及繡被衣物賜之

萬修為偏將軍封造義侯及破邯鄲拜右將軍從光武
平河北更封槐里侯

邳彤為後大將軍及拔邯鄲封武義侯更封靈壽侯

耿純為前將軍封耿鄉侯擊王郎將李暉大破之光武
即位封純高陽侯復拜純為東郡太守詔純將兵擊更

始東平太守范荆降之定封東光侯純辭就國帝曰文帝謂周勃丞相吾所重君為我率諸侯就國今亦然也純受詔而去至鄴賜穀萬斛

朱祐為護軍從光武征河北常力戰陷陣以為偏將軍

封安陽侯光武即位拜為建義大將軍更封堵陽侯

縣名

屬南陽郡後擊黃郵降之賜祐黃金三十斤

景丹為偏將軍從光武擊王郎將兒宏等大破之遂從征河北及帝即位詔舉可為大司馬者帝曰景將軍北

州大將是其人也拜丹為驃騎將軍定封丹櫟陽侯謂
丹曰今關東故王國雖數縣不過櫟陽萬戶邑夫富貴
不歸故鄉如衣繡夜行故以封卿耳丹頓首謝

王梁為偏將軍既拔邯鄲賜爵關內侯從光武平河北
拜野王令

杜茂為中堅將軍嘗從光武征伐即位拜大將軍封樂
鄉侯屬信都國北擊五校於真定進降廣平更封苦陘侯

馬成為期門從光武征伐及帝即位再遷護軍都尉後

拜揚武將軍擊斬李憲盡平江淮地封平舒侯屬代郡

劉隆為騎都尉封亢父侯縣名屬東平國故城在兗州任城縣南俄拜誅

虜將軍討平李憲又守南郡太守增邑更封竟陵侯後

以中郎將副伏波將軍馬援擊交趾蠻夷徵側等隆別

於禁谿口破之交趾即麓冷縣有金谿穴相傳音訛謂之禁溪徵側所敗處也其地今岑州新

昌縣是也獲其帥徵貳徵側之妹斬首千餘級降者二萬餘人還

更封大國為長平侯

傳俊為校尉從光武破王尋等以為偏將軍帝即位以

俊為侍中封昆陽侯

堅鐔為偏將軍從光武平河北及帝即位拜鐔為揚化

將軍封滎彊侯

縣名屬河南
郡滎於靳切

馬武為振威將軍從光武擊羣賊常為先鋒破賊及帝

即位以武為侍中騎都尉封山都侯又與蓋延等討劉

永武別擊濟陰下成武楚丘拜捕虜將軍後擊破西羌

振旅還京增邑七百戶并前千八百戶

竇融初為更始屬國都尉及歸光武為涼州牧光武以

融信效著明詔右扶風修理融父墳塋祠以太牢數馳

輕使致遺四方珍饈及車駕征隗囂融率五郡太守羌

虜小月氏等步騎數萬輜重五千餘兩會高平第一

高平今原

州帝置酒高會引見融待以殊禮隴蜀平詔融與五郡

太守奏事京師官屬賓客相隨駕乘千餘兩馬牛羊被

野融到詣雒陽城門上涼州牧張掖屬國都尉安豐侯

印綬詔遣使者還侯印綬引見就諸侯位賞賜恩寵傾

動京師

馬援為伏波將軍擊斬交阯女賊徵側徵貳傳首雒陽
封為新息侯食邑三千戶又擊其餘黨振旅還京師賜
援兵車一乘朝見位次九卿匈奴烏桓寇扶風援以三
輔侵擾園陵危逼因請行許之復出屯襄國詔百官祖
道

朱浮為偏將軍從光武破邯鄲拜為大將軍幽州牧守
薊城遂討定北邊封舞陽侯食三縣

梁統為宣德將軍與竇融等將兵會光武征隗囂及囂

敗封統為成義侯

張宗為京輔將軍將突騎與征西大將軍馮異共擊關中諸營保破之遷河南都尉

馬嚴明帝時為將軍長史將北軍五校士羽林禁兵三千人屯西河美稷衛護南單于聽置司馬從事牧守謁敬同之將軍勅嚴過武庫祭蚩尤帝親御阿閣觀其士衆時人榮之章帝即位徵拜御史中丞

馬防為城門校尉行車騎將軍事擊金城隴西諸羌破

之詔徵防還拜車騎將軍貴寵最盛與九卿絕席增邑
千三百五十戶

竇固為奉軍都尉擊羌胡有功加特進又擊西域破白
山降車師章帝時追錄前功增邑一千三百戶

耿秉為征西將軍章帝時擊北匈奴大破之封秉美陽
侯食邑三千戶及卒賜以朱棺玉衣將作大匠穿冢假
鼓吹五營騎士三百餘人送葬

竇憲為車騎將軍大破單于於嵯落山遂登燕然山刻

石勒功紀漢威德令班固作銘和帝詔使中郎將持節
即五原拜憲大將軍封陽武侯食邑二萬戶憲固辭封
賜策許焉

班超自章帝建初八年為將兵長史假鼓吹幢麾加都

護討焉者西域五十餘國悉納質內屬焉詔曰超安集

于寘以西遂踰葱嶺迄縣度

迄至也縣度山名縣音玄
謂以繩索懸繩而過也其

處在皮山國以西
罽賓國之東也

出入二十二年莫不賓從改立其王

而綏其人不動中國不煩戎士得遠夷之和同異俗之

心而致天誅蠲宿恥以報將士之讐司馬法曰賞不踰
月欲人速覩為善之利也其封超為定遠侯食邑千戶
超在西域三十一歲至和帝永元十四年八月至雒陽
拜為射聲校尉超素有胃脅疾既至病遂加帝遣中黃
門問病賜醫藥其九月卒年七十一朝廷愍惜焉使者
弔祭贈賵甚厚

耿夔為大將軍左校尉擊匈奴斬閼氏名王已下五千

餘級乃封夔粟邑侯

粟邑縣名屬左馮翊故城
今在同州白水縣西北

鄧騭禹之孫也。殤帝延平元年夏，將左右羽林北軍五校士及諸部兵擊涼部叛羌車駕，幸平樂觀餞送。

滕撫順帝時為九江都尉，討廣陵賊張嬰等，追擊大破之。拜撫中郎將，督揚徐二州事。

馮緄督揚州諸郡軍事，與中郎將滕撫擊破羣賊，遷隴西太守。

度尚桓帝時為中郎將，討擊桂陽賊胡蘭等，斬首三千五百級，詔賜尚錢八萬。

杭徐為中郎將宗資別部司馬擊太山賊公孫舉等破
平之斬首千餘級桓帝封徐烏程東鄉侯五百戶遷泰
山都尉寇盜望風奔亡及在長沙宿賊皆平卒於官下
詔追增封徐五百戶并前千戶

段紀明桓帝時為中郎將擊琅邪賊東郭竇公孫舉等
大破斬之獲首萬餘級餘黨降散封紀明為列侯賜錢
五十萬後為護羌校尉擊先零諸種虜衆大潰時竇太
后臨朝下詔曰先零東羌歷載為患紀明前陳狀必欲

掃滅涉履霜雪兼行晨夜身當矢石感厲吏士曾未決

日凶醜奔破

決匝也決音子牒切謂匝十二辰也

連尸積俘掠獲無筭洗

雪百年之逋負以慰忠將之亡魂

東觀記曰太后詔云此以慰神光馬賢等

亡魂也

功用顯著朕甚嘉之頃東羌盡定當并錄功勤今

且賜紀明錢二十萬勅中藏府調金錢彩物增助軍費

拜紀明破羌將軍徵還京師將秦胡步騎五萬餘人詔

遣大鴻臚持節慰勞於鎬軍至拜侍中

張真為護匈奴中郎將以九卿秩督幽并涼三州擊破

岸羌三州清定而願屬弘農華陰舊制邊人不得內移
惟與因功特聽故始為弘農人焉

皇甫嵩靈帝時為左中郎將平黃巾拜左車騎將軍領
冀州牧封槐里侯食槐里美陽兩縣合八千戶

冊府元龜卷三百七十五

欽定四庫全書

冊府元龜卷三百七十六 宋 王欽若等 撰

將帥部

褒異第二

魏鮮于輔為左度遼將軍從太祖於官渡袁紹破走太祖喜顧謂輔曰而今克之此既天意亦二三子之力也閻柔為烏丸校尉從太祖征三郡烏丸以功封關內侯太祖甚愛柔每謂之曰我視卿如子亦欲卿視我如父

也

公孫康嗣父永寧鄉侯太祖征三郡烏丸屠柳城袁尚等奔遼東康斬送尚首封康襄平侯拜左將軍

張燕為平難中郎將太祖將定冀州燕遣使求佐王師拜平北將軍率眾詣鄴封安國亭侯邑五百戶

夏侯惇字元讓漢末太祖初起惇嘗為裨將從征伐太祖行奮武將軍以惇為司馬別屯白馬遷折衝校尉領東郡太守太祖自徐州還惇從征呂布為流矢所中傷

左目復領陳留濟陰太守加建武將軍封高安鄉侯又
轉領河南尹太祖平河北爲大將軍後拒鄴破遷伏波
將軍領尹如故使得以便宜從事不拘科制獻帝建安
十二年錄惇前後功增封邑千八百戶并前二千五百
戶二十一年從征吳還使惇都督二十六軍留居巢賜
伎樂名倡令曰魏絳以和戎之功猶受金石之樂况將
軍乎二十四年太祖軍擊破呂布惇嘗同載拜前將軍
夏侯淵字妙才惇族弟也太祖初起兵以別部司馬騎

都尉從遷陳留潁川守昌稀反擊降之拜典軍校尉又濟南樂安黃巾徐和司馬俱等攻城殺長吏淵將泰山齊平原郡兵擊大破之十四年以淵爲行領軍太祖征吳還使淵督諸將擊廬江叛者雷緒破之及太祖還鄴以淵行護軍將軍擊破南山賊劉雄并餘黨梁興於鄆拔之斬興封博昌亭侯又破韓遂及降馬超餘衆乃假淵節初抱罕宋建因涼州亂自號河首平漢王太祖使淵討平之太祖下令曰宋建造爲亂逆三十餘年淵一舉滅

之虎步關右所向無前仲尼有言吾與爾不如也增封
三百戶并前八百戶

曹仁爲太祖別部司馬行厲鋒校尉太祖破袁術仁所
斬獲頗多從征徐州仁嘗督騎爲前軍鋒別攻陶謙將
呂繇破之還與大軍合彭城大破謙軍從攻費華即墨
開陽謙遣別將救諸縣仁以騎擊破之太祖征呂布仁
別攻句陽拔之太祖平黃巾迎天子都許仁數有功拜
廣陽太守太祖器其勇畧使不之郡以議郎督騎從破

張繡太祖遂使將騎擊劉備軍破走之又擊破袁紹別將韓洵太祖又從仁計降壺關城於是錄仁前後功封都亭侯從平荊州以仁行征南將軍留屯江寧拒吳衆退之三軍服其勇太祖益壯之轉安平亭侯太祖討馬超以仁行安西將軍督諸將拒潼關破超渭南蘇伯田銀反以仁行驍騎將軍都督七軍討銀等破之復以仁行征南將軍假節屯樊鎮荊州侯音以宛叛畧傍縣仁率諸軍攻破音斬其首還屯樊即拜征南將軍鄢陵侯

彭北征烏丸文帝在東宮爲書戒彭曰爲將奉法不當如征南邪及即王位拜仁車騎將軍都督荆揚益州諸軍事進封陳侯增邑二千并前三千五百戶後召還屯宛攻破吳將陳邵於襄陽即拜仁大將軍又詔仁移屯臨潁遷大司馬

曹休爲曹洪騎都尉參洪軍事太祖謂休曰汝雖參軍其實帥也洪從休議擊劉備將吳蘭大破之太祖拔漢中諸將還長安拜休中領軍文帝初即位爲領軍將軍

錄前後功封東陽亭侯夏侯惇薨以休爲鎮南將軍假節都督諸軍事車馬臨送帝乃下與執手而別吳遣將屯歷陽休到擊破之又別遣兵渡江燒賊蕪湖營數千家遷征東將軍領揚州刺史進封安陽鄉侯帝征吳以休爲征東大將軍假黃鉞督張遼等及諸州郡二十餘軍擊吳大將呂範等於洞浦破之拜揚州牧明帝即位進封長平侯吳將審德屯皖休擊破之斬德首吳將韓綜翟丹等前後率衆詣休降增邑四百并前二千五百

戶遷大司馬都督揚州如故

曹真字子丹太祖使將虎豹騎討靈丘賊拔之封靈壽亭侯以偏將軍將兵擊蜀別將於下辨破之拜中堅將軍從至長安領中領軍是時夏侯淵沒於陽平太祖憂之以真爲征南護軍督徐晃等破蜀別將高詳於陽平太祖自至漢中拔出諸軍使真至武都迎曹洪等還屯陳倉文帝即王位以真爲鎮西將軍假節都督雍涼州諸軍事錄前後功進封東鄉侯張進等反於酒泉真遣費

耀討破之斬進等黃初三年遷京都以真為上軍大將
軍都督中外諸軍事假節鉞與夏侯尚等征孫權擊牛渚
屯破之轉拜中軍大將軍加給事中明帝即位進封邵
陵侯遷大將軍諸葛亮圍陳倉真遣將軍郝昭王生守
陳倉有備亮不能克增邑并前二千九百戶及朝雒陽
遷大司馬賜劔履上殿入朝不趨

夏侯尚為中領軍文帝踐阼更封平陵鄉侯遷征南將
軍領荊州刺史假節都督南方諸軍事擊破蜀別軍於

上庸遷征南大將軍車駕幸宛使尚率諸軍與曹真共圍江陵尚夾江燒其舟船水陸並攻破之城未拔會大疫尚引諸軍還益封六百戶并前九百戶假鉞進為荊州牧降附蠻夷數千家徙封昌陵鄉侯尚疾篤還京都帝數臨幸執手涕泣

鍾繇為司隸校尉持節都督關中諸軍太祖在官渡與袁紹相持繇送馬二千餘匹給軍太祖與繇書曰得所送馬甚應其急關右平定朝廷無西顧之憂足下之勲

也昔蕭何鎮守關中足食成軍亦適當耳

程昱為振威將軍收山澤亡命得精兵數千人乃引軍與太祖會黎陽討袁譚袁尚譚尚破走拜昱為奮武將軍封安國亭侯文帝踐阼為衛尉進封安鄉侯增邑三百戶并前八百戶方欲以為公會薨帝為流涕追贈車騎將軍

郭嘉為司空軍祭酒征呂布三戰破之又從太祖破袁紹紹死又從討譚尚於黎陽連戰數克諸將欲乘勝遂

攻之嘉以為不可太祖乃南征軍至西平譚尚果爭冀州譚為尚軍所敗走保平原遣辛毗乞降太祖還救之遂從定鄴又從攻譚於南皮冀州平封嘉洧陽亭侯及疾篤太祖問疾者交錯及薨臨其喪哀甚乃表曰軍祭酒郭嘉自從征伐十有一年每有大議臨敵制變臣策未決嘉輒成之平定天下謀功為高不幸短命事業未終追思嘉勲實不可忘可增邑八百戶并前千戶

蔣濟為散騎常侍與大司馬曹仁征吳仁薨以濟為東

中郎將代領其兵詔曰卿兼資文武志節抗愾嘗有超越江湖吞吳會之志故復授將帥之任

郝昭為將軍守陳倉蜀將諸葛亮攻之二十餘日昭固守亮乃退明帝詔嘉昭善守賜爵列侯及還帝引見慰勞之顧謂中書令孫資曰卿鄉里乃有爾曹快人為將若如此朕復何憂乎仍欲大用之會病亡

張既為雍州刺史文帝即王位初置涼州以安定太守鄒岐為刺史張掖張進執郡守舉兵拒岐黃華麴演各

逐故太守舉兵以應之既進兵為護羌校尉蘓則聲勢
故則得以有功既進爵都鄉侯涼州盧水胡伊健妓妾
治元多等反河西大擾帝憂之曰非既莫能安涼州乃
召鄒岐以既代之擊胡大破之帝甚說詔曰卿踰河歷
險以勞擊逸以寡勝衆功過南仲勤踰吉甫此勲非但
破胡乃永寧河右使吾長無西顧之念矣徙封西鄉侯
增邑二百戶并前四百戶

賈逵為豫州刺史關內侯黃初中與諸將並征吳破呂

範於洞浦進封陽里亭侯加建威將軍明帝即位增邑二百戶并前四百戶

任峻為典農中郎將太祖使峻典軍器糧運賊數寇鈔絕糧道乃使千乘為一部十道方行為複陳以營衛之賊不敢近軍國之饒起於羽林監棗祗而成於峻太祖以峻功高乃表封為都亭侯邑三百戶遷長水校尉

蘇則為酒泉安定武都太守所在有威名太祖征張魯使為軍導魯破徙為金城太守文帝初西平麴演叛稱

護羌校尉則勒兵討之演恐乞降帝以其功加則護羌校尉賜爵關內侯後演復結旁郡為亂及武威三種胡并寇鈔道路斷絕武威太守毋丘興告急於則乃發兵救武威降其三種胡與興擊敗演軍河西平乃還金城進封都亭侯邑三百戶

張遼為中郎將數有戰功遷裨將軍從太祖討袁譚袁尚於黎陽有功行中堅將軍又破遼東賊柳毅等還都太祖自出迎遼引共載以遼為盪寇將軍復別擊荊州

定江夏諸縣還屯臨潁封都亭侯從征袁尚於柳城卒
與虜遇遼勸太祖戰氣甚奮太祖壯之自以所持麾授
遼遂擊大破之太祖論諸將功曰登天山履峻險以取
蘭成盪寇功也增邑假節遼又率諸軍討吳追擊大帝
幾獲之太祖大壯遼拜征東將軍文帝即位轉前將軍
賜帛千匹穀萬斛吳復叛遣遼還屯合肥進遼爵都鄉
侯給遼母輿車及兵馬送遼家詣屯勅遼母至導從出
迎所督諸將軍吏皆羅拜道側觀者榮之文帝踐阼封

晉陽侯增邑千戶并前二千六百戶黃初二年遼朝雒陽宮帝引遼會建始殿親問破吳狀帝嘆息顧左右曰此亦古之召虎也為起第舍又特為遼母作殿以遼所從破吳軍應募步卒皆為虎賁吳復稱藩遼還屯雍丘得疾帝遣侍中劉暠將太醫視疾虎賁問消息道路相屬疾未瘳帝迎遼就行在車駕親臨執其手賜以御衣太官日送御食疾小差還屯吳復叛遼與諸將破之遼病篤薨於江都帝為流涕

樂進為陷陣都尉從擊呂布於濮陽張超於雍丘橋蕤於苦皆先登有功封廣昌亭侯從征張繡於安衆圍呂布於下邳破別將擊眭固於射犬攻蜀先主於沛皆破之拜討寇校尉渡河攻獲嘉還從擊袁紹於官渡力戰斬紹將淳于瓊從擊譚尚於黎陽斬其大將嚴敬行游擊將軍別擊黃巾破之定樂安郡從圍鄴鄴定從擊袁譚於南皮先登入譚東門譚敗別攻雍奴破之太祖表漢帝稱進功遷折衝盪寇將軍太祖征管承軍淳于遣

進與李典擊之承破走逃入海島海濱平荊州未服遣屯陽翟後從平荊州留屯襄陽擊關羽蘇非等皆走之南郡諸縣山谷蠻夷詣進降又討蜀臨沮長杜普旌陽長梁太皆大破之後從征吳假進節太祖還留進與張遼李典屯合肥增邑五百戶并前凡千三百戶遷右將軍

于禁為軍司馬太祖使將兵詣徐州攻廣威拔之拜陷陣都尉從征黃巾劉辟黃邵等擊破之遷平虜校尉初

黃中降號青州兵太祖寬之故敢因緣為畧禁怒乃討之青州兵詣太祖自訴或謂禁青州兵已訴君矣宜促詣公辨之禁乃入謁具陳其狀太祖悅謂禁曰將軍在亂能整討暴堅壘有不可動之節雖古名將何以加之於是錄禁前後功封益壽亭侯又太祖使禁別將屯原武擊袁紹別營於杜氏津破之遷裨將軍禁又督守土山力戰紹破遷將軍又征昌豨降之是時太祖軍淳于間而嘆曰豨降不詣吾而歸禁豈非命邪益重禁東海

平拜禁虎威將軍後與臧霸等攻梅成張遼張郃等討
陳蘭遂斬蘭成增邑二百戶并前千二百戶又太祖嘗
恨朱靈欲奪其營禁徑詣靈營奪其軍衆皆震服遷右
將軍假節鉞

張郃為偏將軍封都亭侯從太祖攻鄴拔之又從擊袁
譚於渤海別將軍圍雍奴大破之以功遷平狄將軍又
別督諸軍降巴東巴西二郡還南鄭拜盪寇將軍太祖
在長安遣使假郃節文帝即王位以郃為左將軍進爵

都鄉侯及踐阼進封鄴侯諸葛亮出祁山加郤位特進
遣督諸軍拒亮絕其汲道擊大破之南安天水安定郡
反應亮郤皆破平之詔曰賊亮以巴蜀之衆當虓虎之
師將軍被堅執銳所向克定朕甚嘉之益邑千戶并前
四千三百戶郤屯方城會諸葛亮復出急攻陳倉明帝
驛馬召郤到京都帝自幸河南城置酒送郤遣南北軍
士三萬及分遣武衛虎賁使衛郤

徐晃河東揚人也為郡吏從車騎將軍楊奉討賊有功

拜騎都尉及歸太祖太祖授晃兵使擊卷

卷音墟
權切

原武

賊破之拜裨將軍從征呂布別降布將趙庶李鄒等與
史渙斬眭固於河內從破蜀先主又從破顏良拔白馬
進至延津破文醜拜偏將軍與曹洪擊臆彊賊祝臂破
之又與史渙擊袁紹運車於故市功最多封都亭侯又
從征蹋頓拜橫野將軍馬超等反關右遣晃屯汾陰以
撫河東賜牛酒令上先人墓又從征張魯別遣晃討攻
積仇夷諸山氏皆降之遷平寇將軍晃助曹仁討關羽

羽圍仁於樊又圍將軍呂常於襄陽晃擊退之振旅還
摩陂太祖迎晃七里置酒大會太祖舉卮酒勸晃且勞
之曰全樊襄陽將軍之功也時諸軍皆集太祖案行諸
營士卒咸離陣觀而晃軍營整齊將士駐陣不動太祖
嘆曰徐將軍可謂有周亞夫之風矣文帝即王位以晃
為右將軍進封為遂鄉侯及踐阼進封楊侯與夏侯尚
討蜀先主於上庸破之以晃鎮陽平徙封陽平侯明帝
即位拒吳將諸葛瑾於襄陽增邑二百戶并前三千一

百戶

李整者典之從父乾子也太祖使整將乾兵與諸將擊
蘭封蘭封破從平兗州諸縣有功稍遷青州刺史

李典為裨將從太祖圍鄴鄴定與樂進圍高幹於壺關
擊管承於長廣皆破之遷捕虜將軍封都亭侯典宗族
部曲三千餘家居乘氏自請徙詣魏郡太祖嘉之遷破
虜將軍又率將與張遼破走吳大帝增邑百戶并前三
百戶

李通爲振威中郎將太祖討張繡通爲先登大破繡軍
拜裨將軍封建功侯分汝南二縣以通爲楊安都尉太
祖與袁紹相拒於官渡紹遣使拜通征南將軍劉表亦
陰招之通皆拒焉又擊羣賊瞿恭江官沈成等皆破殘
其衆送其首遂定淮汝之地改封都亭侯拜汝南太守
又破攻賊張赤等五千餘家蜀先主與周瑜圍曹仁於
江陵通率衆入圍迎仁軍勇冠諸將通得病死追增邑
二百戶并前四百戶

臧霸為琅邪相太祖方與袁紹相拒而霸數以精兵入
青州故太祖得專事封霸為都亭侯加威虜將軍又與
夏侯淵討黃巾餘賊徐和等有功遷徐州刺史沛國公
文帝踐阼進封開陽侯徙封良成侯與曹休討吳賊破
呂範於洞浦徵為執金吾位特進明帝即位增邑五百
戶并前三千五百戶

文聘為江夏太守太祖使典北兵委以邊事賜爵關內
侯與樂進討關羽於尋口有功進封延壽亭侯加討逆

將軍又攻羽輜重於漢津燒其船於荊城文帝踐阼進封長安鄉侯假節與夏侯尚圍江陵使聘別屯沔口止石梵自當一隊禦賊有功遷後將軍封新野侯聘又追擊吳大帝衆破之增邑五百戶并前千九百戶

呂虔領泰山太守引兵與夏侯淵擊黃巾徐和等斬首獲生數千人太祖使督青州諸郡兵以討東萊羣賊李條等有功太祖令曰夫有其志必成其事蓋烈士之所徇也卿在郡以來擒姦討暴百姓獲安躬蹈矢石所征

輒克昔寇恂立名於汝潁耿弇建策於青兗古今一也
舉茂才加騎都尉文帝即位加裨將軍封益壽亭侯遷
徐州刺史加威虜將軍又討利城叛賊斬獲有功明帝
即位徙封萬年亭侯增邑二百戶并前六百戶

許褚爲都尉從太祖征張繡先登斬首萬計遷校尉又
從圍鄴力戰有功賜爵關內侯從討韓遂馬超大破之
遷武騎中郎將文帝踐阼進封萬壽亭侯遷武衛將軍
都督中軍宿衛禁兵初褚所將爲虎士者從征伐太祖

以為皆壯士也同日拜為將其後以功為將軍封侯者數十人都尉校尉百餘人明帝即位進牟鄉侯邑七百戶褚允定亦以軍功封為振威將軍都督徼道虎賁

典韋為都尉每戰鬪常先陷陳遷為校尉從征張繡創重瞋目大怒而死太祖退駐舞陰聞韋死為流涕募間取其喪親自臨哭之遣歸葬襄邑車駕每過常祠以中牢

龐德少為郡吏州從事漢末獻帝初平中從馬騰擊反

羌叛氏數有功稍遷至校尉建安中太祖討袁譚尚於
黎陽譚遣郭援高幹等畧取河東太祖使鍾繇率關中
諸將討之德隨騰子超拒援幹於平陽德為軍鋒進攻
援幹大破之親斬援首拜中郎將封都亭侯太祖定漢
中素聞其驍勇拜立義將軍封關門亭侯邑三百戶

裴潛為兗州刺史太祖次摩陂嘆其軍齊整特嘉賞賜
衛臻為侍中中護軍諸葛亮寇天水臻奏宜遣奇兵入
散關絕其糧道明帝乃以臻為征蜀將軍假節督諸軍

事到長安亮退加光祿大夫

趙儼以議郎參曹仁軍事南行遷平寇將軍文帝黃初三年賜爵關內侯吳大帝寇邊征東大將軍曹休統五州軍禦之徵儼為軍師吳眾退封宜土亭侯

孫禮明帝時為揚州刺史伏波將軍賜爵關內侯吳大將全琮帥數萬眾來侵寇時州兵休使在者無幾禮躬勒衛兵禦之戰於芍陂奮不顧身賊眾乃退詔書慰勞賜絹七百疋

辛毗爲侍中賜爵關內侯上軍大將軍曹真征朱然于江陵毗行軍師還封廣平亭侯

楊阜爲參軍事與馬超戰身被五創宗族昆弟死者七人超遂南奔張魯隴右平定太祖封討超之功賜阜爵關內侯

滿寵爲奮威將軍屯當陽吳大帝數擾東陞復召寵還爲汝南太守賜爵關內侯關羽圍襄陽寵助征南將軍曹仁屯樊城拒之寵力戰有功羽退進封安昌亭侯文

帝即王位遷揚武將軍破吳於江陵有功更拜伏波將軍屯新野大軍南征到精湖寵帥諸軍在前與賊隔水相對寵擊破之進封南鄉侯黃初三年假寵節鉞五年拜前將軍明帝即位進封昌邑侯太和二年領豫州刺史四年拜寵征東將軍青龍三年寵遣長史督二軍循江東下摧破吳諸屯而還詔美之景初二年以寵年老徵還遷為太尉寵不治產業家無餘財詔曰君典兵在外專心憂國奉公有行父祭遵之風賜田十頃穀五百斛錢

二十萬以明清忠儉約之節焉寵前後增邑凡九千六百戶

田豫文帝時使持節護烏丸校尉山賊高艾衆數千人寇鈔為幽冀害豫誘使鮮卑素利部斬艾傳首京都封豫長樂亭侯文帝太和末公孫淵以遼東叛帝欲征之而難其中領軍楊暨舉豫應選乃使豫以本官督青州諸軍假節往討之後吳復來寇豫往拒之賊即退景初末增邑三百并前五百戶齊王正始初遷使持節護

匈奴中郎將加振威將軍領并州刺史

牽招初為太祖軍謀掾從討烏丸至柳城拜護烏丸校尉從平漢中太祖還留招為中護軍事罷還鄴拜平虜校尉將兵督青徐州諸軍事擊東萊賊斬其渠帥東土寧靜文帝踐阼拜招使持節護鮮卑校尉大軍征吳召招還至值軍罷拜右中郎將出為鴈門太守明帝即位賜爵關內侯

郭淮為丞相兵曹議令史從征漢中太祖還留征西將

軍夏侯淵拒蜀先主以淮為淵司馬與蜀先主戰淮時
有疾不出淵遇害軍中擾擾淮收散卒推盪寇將軍張
郃為軍主諸營乃定太祖善之假郃節復以淮為司馬文
帝即王位賜爵關內侯轉鎮西長史行征羌護軍擢領
雍州刺史封射陽亭侯黃初五年為真安定羌大帥太
和二年蜀相諸葛亮出祁山遣將軍馬謖至街亭高詳
屯列柳城張郃擊謖淮攻詳營皆破之又破隴西羌唐
蹠於枹罕加建威將軍齊王正始初轉前將軍夏侯玄

伐蜀淮督諸軍為前鋒淮度勢不利輒拔軍出故不敗
還假淮節姜維之出石營從彊川乃西迎叛胡治無載
留陰平太守廖化於成重山築城淮乃別遣夏侯霸等
追維於沓中淮自率諸軍就攻化等維果馳還救化皆
如淮計進封鄉都侯嘉平元年遷征西將軍都督雍涼
諸軍事是歲與雍州刺史陳泰協策降蜀牙門將句安
等於超上二年詔曰昔漢川之役幾至傾覆淮臨危濟
難功書王府在關右三十餘年外征寇虜內綏民夷比

歲以來摧破廖化禽虜句安功績顯著朕甚嘉之今以
淮為車騎將軍儀同三司持節都督如故進封陽曲侯
邑凡二千七百八十戶

陳泰以齊王嘉平初代郭淮為雍州刺史加奮威將軍
淮薨代為征西將軍假節都督雍涼諸軍事及吳大將
孫峻出淮泗以泰為鎮軍將軍假節都督淮北諸軍事
及諸葛誕作亂壽春司馬文王率六軍軍丘頭泰總署
行臺司馬前後以功增邑二千六百戶

胡質為荊州刺史振威將軍賜爵關內侯吳大將軍朱然圍樊城質輕軍赴之遂勒兵臨圍城中乃安遷征東將軍假節都督青徐諸軍事嘉平二年薨家無餘財追進封陽陵亭侯邑百戶

王基為荊州刺史揚烈將軍隨征南王昶擊吳虜安北將軍譚正納降數千口賜爵關內侯高貴鄉公即位進封常樂亭侯毋丘儉文欽作亂以基為行監軍假節統許昌軍儉使文欽將兵襲鄧艾基知其勢分進兵偏項

儉衆乃敗欽等已平遷鎮南將軍都督豫州諸軍事領
豫州刺史進封安樂鄉侯諸葛誕反基以本官行鎮東
將軍都督揚豫諸軍事進封東武侯是歲基母卒詔祕其凶
問迎基父豹喪合葬雒陽甘露四年轉為征南將軍都
督荊州諸軍事常道鄉公即尊位增邑千戶并前五千
七百戶景元二年薨追贈司空

王凌文帝時為兗州刺史與張遼等至廣陵討吳凌與
諸將逆擊捕斬首虜有功封宜成亭侯加建武將軍齊

王正始初為征東將軍假節都督揚州諸軍事二年吳大將全琮數萬衆寇芍陂凌率諸軍逆討與賊爭塘力戰賊退進封南鄉侯邑千三百五十戶遷車騎將軍儀同三司

毋丘興者儉之父也黃初中討賊張進及討叛胡有功封高陽鄉侯毋丘儉為荊州刺史明帝圖討遼東以儉有幹策徙為幽州刺史加度遼將軍使持節護烏丸校尉率幽州諸軍公孫淵逆與儉戰不利引還明年帝遣

太尉司馬宣王統中軍及儉等衆數萬討淵定遼東儉以
功進封安邑侯邑三千九百戶齊王正始中儉以高句
驪數侵叛督諸軍步騎萬人出玄菟從諸道討之斬獲
首虜以千數遷左將軍假節監豫州諸軍事領豫州刺
史

諸葛誕為鎮東大將軍都督揚州吳大將孫峻呂據留
贊等聞淮南亂會文欽往乃帥衆將欽徑至壽春誕諸
軍已至城不可攻乃走誕遣將軍蔣班追擊之斬贊傳

首收其印節進封高平侯邑三千五百戶

鄧艾為南安太守齊王嘉平元年與征西將軍郭淮拒蜀軍姜維屯白水維潛軍來而渡艾先至據城得以不敗賜爵關內侯加討寇將軍高貴鄉公即位進封方城亭侯吳大將軍孫峻等號十萬眾將渡江艾遣泰山太守諸葛緒等於黎漿拒戰遂走之徵拜長水校尉以破文欽等功進封方城鄉侯行安西將軍解雍州刺史王經圍於狄道姜維退駐鍾提乃以艾為安西將軍假節

領護東羌校尉與維戰於段谷大破之高貴鄉公甘露
元年詔曰逆賊姜維連年狡黠民夷騷動西土不寧艾
籌畫有方忠勇奮發斬將十數馘首千計國威振於巴
蜀武聲揚於江岷今以艾為鎮西將軍都督隴右諸軍
事進封鄧侯分五百戶封子忠為亭侯二年拒姜維於
長城維退還遷征西將軍前後增邑凡六千六百戶陳
留王景元三年征蜀降之詔曰艾耀威奮武深入虜亭
斬將搴旗梟其鯨鯢僭號之主稽首係頸歷世逋誅一

朝而平兵不踰時戰不終日雲徹席卷盪定巴蜀雖白
起破彊楚韓信克勁趙吳漢禽子陽亞夫滅七國計功
論美不足比勲也其以艾為太尉增邑二萬戶

鍾會為鎮西將軍假節都督關中諸軍事陳留王景元
四年秋會移檄蜀將吏士民會與諸葛緒進攻劔閣蜀
軍保險拒守鄧艾遂至緜竹大戰斬諸葛瞻維等聞瞻
已破率其衆東入于巴會乃進軍至涪遣胡烈田續龐
會等追維艾進軍向成都蜀後主詣艾降遣使勅維等

令降於會十二月詔曰會所向摧弊使前無強敵緘制
衆城網羅迸逸蜀之豪帥面縛歸命舉無廢功凡所降
誅勳以萬計全勝獨克有征無戰拓平西夏方隅清晏
其以會為司徒進封縣侯增邑萬戶

冊府元龜卷三百七十六